

KIMSAYNIN JUANPA KUNASHPA KILLKASHKAN

Juan Gayota kushichishkanmanta riman

¹Munashkayni Gayo, ñuka ruku yachachik kayta kanrayku killkahuni. Yapa yuyashkayni runami kanki.

²Munashkayni wawkini, yachani ña alita Yaya Diospi sinchikurihushkaykita. Chasna kashpan payta mañani kanta wakaychashpan tukuyupi alita yanapanpa, chaymantapas nima shuk unkuy kanta apinanpa. ³Shuk kirik masinchikuna shamushpankuna Yaya Diospa shutipa kashkata riksichik shiminta alita kasuhushkaykita kwintawashkakuna. Chayta yachashpayni achkata kushikushkani. ⁴Wawaynikunashina kahuk runakuna shutipa kashkata kasushpa kawsahushpankuna atunta kushikuni. Chaymanta pasa kushikunaka ñukarayku mana tiyanchu.

⁵Munashkayni wawkini, tukuy uras shuk llaktakunamanta Jesukristuta kirik masinchikunata alita yanapashpa kawsahunki, paykunata mana riksishpaykipas. ⁶Jesukristuta kirikkuna tantarishkanchipi ñukanchita kwintashkakuna maytukuytami paykunata yuyashpa yanapashkanki. Wawkini, kuti kanpi paktashpankuna Yaya Dios munashkanshina paykunata munahushkankunapi yanapay, katinankunapa alilla maytachari Yaya Diospa shiminta yachachik rihunkuna. ⁷Jesukristumanta

yachachishpa purihushkankunarayku paykunata yanapay. Manami munashkankunachu Yaya Diosta mana kasukkuna paykunapa pishihushkanpi yanapanankunata. ⁸Chasna kashpanmi ñukanchi kirikkuna pishihushkata kushpa paykunata yanapananchi tiyan, shutipa kashkata yachachihushkankunapi yanapay kananchipa.

Juan riman Diotrefeska mana alita rurashkanmanta

⁹Kankuna chaypi tantarik Jesukristuta kirikkunarayku killkashpayni Diotrefeska paylla kamachik kanayashkanrayku killkashkaynita mana kasushkachu. ¹⁰Chasna kashpan kankunama rishpayni tantarishkaykichipi tukuy paypa rurashkanta rimasha, yanka millaypa shimikunata ñukanchimanta rimashpa purihushkanta. Payka manami rimashkanllawachu kparishka, ashwan shuk partimanta kirikkuna paktashpankuna wasinpi mana yatkuchinayanchu. Shuk kankuna Jesukristuta kirikkunamanta paykunata yatkuchinayashpaykichi payka mana munashpan kankunata tantarinaykichimanta wichun.

¹¹Munashkayni wawkini, ama ruraychu runakuna mana alita rurashkankunatashina. Ashwan runakuna alita rurashkankunatatashina ruray. Maykan runami alita rurak kan, payka Yaya Diospa wawanmi.

Maykan runami mana alita rurakchu kan,
 payka manami Yaya Diostaka riksinchu.
¹²Wawkinchi Demetriomanta tukuy
 runakuna alita rurak kananta rimanahun.
 Chaymantapas Yaya Diospa shutipa
 kashkata riksiehik shimin paymanta ali
 kananta rimahukshina kan chay shimita
 kasuhushkanwa rikuchishkanrayku.
 Ñukanchipas alita rurak kananta rimanchi.
 Kanka yachanki shutipa kashkata
 rimahushkanchita.

**Juan saludashpa
 killkashkanta tukuchin**

¹³Ñukapa achka tiyawashpanpas
 kanrayku killkanaynipa, mana

munanichu killkashpa rimanata.
¹⁴Ashwan munanimi utkalla kanta
 rikuk rinata ñawipura kwintanan-
 chipa. ¹⁵Yaya Dioska kanta yanapa-
 chun kushilla kawsanaykipa. Kaypi
 kahuk kanpa munashkayki wawkin-
 chikuna paninchikuna kanta saluda-
 nahun. Chaymantapas chaypi kahuk
 munashkanchi wawkinchikunata
 paninchikunata saludapay karan
 shukta.

Chayllata killkashkani.

Wawkiki
 Juan